

Hset Galati

Phaulô achih ka mangai Galati....

1..

Bầu hmàih ka oh daq

¹ Phaulô broq mangai Tiaq cla da Christ – ùh xài enh kon mangai , hadai ùh i canòm qmòe ka cabô the , mahaq enh cla Chuaq Jesus Christ xam Boc Plinh aih Baq , Mangai ma broq ka Chuaq Jesus khoe rih hlài enh mangai cachit . ² Xam diq đồng oh daq oe pajùm ti au , achih am ka bài Tagop Hadròeh oe gùng Galati . ³ Waiq ka oh daq jah kan catèm xam kan tabàih dech enh Boc Plinh aih Baq xam enh Chuaq Jeus Christ aih Chuaq da bèn . ⁴ Haq aih mangai khoe cachit am ka yiniq lui bèn , òòeq hu dèch bèn jah claih enh qnhòng ngang dù kô , wop qmang ka manoh Boc Plinh , aih Baq bèn , ⁵ Kan ranhòm mòeq òòeq ùh lùch jah diq ta haq ! Amen.

I mòeq Bầu Lem raq.....

⁶ Au hamàih ka oh daq ma rênk ka cadac mangai ma creò ka oh daq trùh rih ta kan tabàih dech da Christ , òòeq hu cadau tiaq bầu lem ma qnoeq . ⁷ Joq qnàng ùh i ka bầu lem ma qnoeq ,mahaq i toq bài mangai enh broq ka oh daq loh ka manhài ta manoh, rai enh raliang đac Bầu lem da Christ. ⁸ Mahaq tàng i cabô , yac ka cla nhèn , yac ka bình plinh oe ta plinh , hnài ka oh daq bầu lem ma qnoeq crài ka Bầu lem da nhèn ma khoe hnài oh daq , mangai aih khoe khòh ka Anathem (*)

⁹ Au khoe doe , kô au anoe hòm : Tàng joq loq i cabô hnài ka oh da bầu lem ma qnoeq crài ka Bầu lem oh daq ma khoe jah , mangai khòh ka Anathem đac hloe ! . ¹⁰ Manòeq kô , au àu òòeq yòc manoh kon mangai ,loq òòeq jah manoh Boc Plinh ? Tàng joq au oe raq enh broq lem manoh kon mangai , au pi xài hapõng da Christ .

Phaulô khoe jah Boc Plinh creò

¹¹ Manòeq kô au anoe dõq pi oh daq loq rameh : Bầu lem au khoe hnài, aih ùh xài loh enh kon mangai . ¹² majah qmang aih au ùh i tàng ,ùh i yòc Bầu lem aih enh cabô , mahaq au khoe jah qmòe enh cla Chuaq Jesus Christ mahnu am ka au . ¹³ Majah qmang aih , oh daq hmaq tàng adroe nèh au tiaq trong da mangai Judà, au rih acaq qmang leq cadèh , au ti khech rùp rai ti raliang đac Tagop Hadròeh da Boc Plinh oe palap cleq , ¹⁴ Hadai nhèn mangai mòeq lóp mòeq diac ma hanoh tiaq trong da mangai Judà au yi loe đồng ka wì qnoeq, au nhet pi cajaq trong wèq tiaq bầu boc yaq nhèn ma qmon enh nèh . ¹⁵ Mahaq apang jò Boc Plinh haq ma khoe ràih òòeq au enh jò au oe raq ta cliac miq , yòc kan tabàih dech òòeq creò ka au . ¹⁶ Haq khoe lem manoh òòeq mahnu dèh kon haq am ka au , òòeq au jah anoe Kon aih am ka mangai diac wì , tajòe qmòe au pi gòm hatinh ka wa xech wa akia . ¹⁷ Au hadai ùh tõi ta Jerusalem , òòeq glàm bài mangai Tiaq cla ma adroe ka au , mahaq au lam tagùng Arabi , atiq ka aih au hlài ta Đamat . ¹⁸ Khoe èh piq hanam atiq ka aih , au tõi ta Jerusalem , òòeq ta canau ka Sêpha , au oe ti haq mòeq jàt padam hi , ¹⁹ mahaq au ùh hnoq qmòe mangai qnoeq enh gùng ka Jaco aih oh da Chuaq . ²⁰ Joq qnàng enh ngèa Boc Plinh, rìm yiniq au achih ka oh daq kô au ùh qnùt . ²¹ Khoe aih au lam ta cròng Siri xam gùng Silisi , ²² jò aih bài Tagop Hadròeh da Christ tagùng Judê qnhòq lòm

canau ka au .²³ Wì haq toq hĩa tàng doe : Mangai ma toq ti chaq rùp bèn adroe kô nèn , manòeq kô haq aih qnang hnài trong haq ma àu raliang đac nèn haq .²⁴ Aih iq , nen ajang au wì haq majah toq manè apôi Boc Plinh.

2

Tagop Hadròeh ta Jerusalem carùp tì ka Phaulô

¹ Khoe aih, moèq jàt pôn hanam , au tồc hòm ta Jerusalem ti Banaba , i qnong Tit lam tiaq ma .² Au iu tiaq bàu mahnu, tồc ta aih ðòeq taqmon hlài Bàu Lem au khoe hnài ka mangai diac wì ðòq oh ðaq jah loq , mahaq au taqmon hlài toq ka wì ma broq gàu Tagop Hadròeh ,majah qmang aih au waq ka jah panhìn ðòeq biac cadàu da au enh nèn trùh mamòeq ùh hĩaq ngwan .³ Yac kaTit , mangai ma lam tiaq au aih mangai Gorec ,mahaq dua ùh hĩaq ep broq ramèn kat akia .⁴ Nhèn majah broq qmang aih , taiq i bĩaq ngai patiah ðeh hanoh broq oh ðaq , mùt taqne nhèn hu ti achop rinh ngan cwiang da nhèn jah enh dalam ka Chuaq Jesus Christ , ðòeq rùp nhèn broq ðic broq hapõng .⁵ Nhèn ùh talùi ka wì haq yac ka toq xit hnha , blinh qmòe nhèn ùh oe enh qneq ka cwiang da wì haq , ðòeq kan joq qnàng da Bàu lem jah hagau taqne oh ðaq .⁶ Anoe trùh mangai ma i bang tiang ma haqnheq wì ma iu camaih ðeh raya (yac ka enh nèn wì haq mangai qmang leq , aih dua ùh ep cleq ka au , Boc Plinh ùh i yi loq waq ka cabô) wì aih hanoh ùh tam mòeq nà bàu cleq ta bàu hnài da au .⁷ Majoq qnàng aih, wì haq hnoq biac hnài Bàu lem ka mangai ùh broq ramèn kat akia Chuaq khoe the au , tiaq ka biac hnài Bàu Lem ka mangai broq ramèn kat akia ma khoe the Phiero ðiq .⁸ Majah qmang aih , Boc Plinh ma khoe broq ta manoh cliac Phiero , ðòeq the haq broq mangai tiaq cla am ka mangai kat akia hadai broq ta manoh cliac ðòeq the au broq mangai tiaq cla am ka mangai diac wì .⁹ Jò Jaco , Sêpha , Jon , aih bài mangai wì ma ngan tiaq ðeh ka long jrang kàn , wì canau kan tabàih ðech khoe jah am ka au , wì hnhu kõng pah qma hu carùp tì ka ma Banaba , ðòeq ma lam trùh ta mangai diac wì , wì haq aih lam trùh ta mangai khoe broq ramèn kat akia .¹⁰ Wì aih toq tanap ka au ep hmàng trùh mangai pa , trong aih au hadai khoe nhèt ka broq haraya .

Phaulô tagàih ka Phiero

¹¹ Mahaq jò Sêpha trùh ta Antiôt , au i tagàih enh ngèa ka haq , majah qmang aih haq broq joq khoe ùh troq .¹² Jò mangai Jaco the lam qnhòq i trùh , aih haq acaq pajùm ti mangai diac wì , yàng jò wì bu trùh haq padinh yòng lah ðeh oe crài, majah qmang aih haq yùq ka bài mangai khoe broq ramèn kat akia .¹³ Bài mangai Juđa qnoeq hadai top dua ùh wĩa qmang aih , jaq Banaba hadai loh qmòe ka broq tiaq kan ùh wĩa da bài aih .¹⁴ Mahaq jò au hnoq wì haq lam ùh jang tiaq kan joq qnàng da Bàu lem , enh ngèa bàc ngai ,au doe ka Sêpha “ Tàng ih kô mangai Juđa ,mahaq acaq oe hadai hatiah ka mangai diac wì ,ùh tiaq ranenh da mangai Juđa , aih hagleg ih majah the mangai diac wì tiaq ranenh da mangai Juđa ?

¹⁵ Nhèn kô jò ha-uang loh aih khoe mangai Juđa ,ùh xài mangai i yiniq lui loh enh mangai diac wì .¹⁶ Yac ka qmang aih , bèn loq kon mangai jah kan taq atq ,ùh xài canòm ka broq tiaq trong ranenh the , mahaq canòm ka manoh lui enh dalam ka Christ , ðài haq nhèn majah khoe lui Chuaq Jesus Christ , ðòeq hujah wĩa mangai taq atq tiaq manoh lui enh dalam Christ , ùh xài canòm ka broq tiaq trong ranenh the , majah qmang aih ùh i cabô broq tiaq trong ranenh the ma jah kan taq atq .¹⁷ Mahaq , tàng joq nhèn qnang chaq broq qmang leq hujah kan taq atq enh dalam ka Christ , yàng wì doe nhèn mangai i yiniq lui , tàng qmang aih Christ aih ma hapõng da

yiniq lui qmòh ? Ùh lòm qmang aih ! ¹⁸ Joq , tàng au dèch paqnàng hlài yiniq au ma khoe raliang đac , aih ajoq cla au raq doe deh kô khoe ùh troq ka ranenh . ¹⁹ Majah qmang aih ,tiaq ranenh , au khoe cachit am ka ranenh , ðòeq hu rih ka Boc Plinh . ²⁰ Au khoe tiang đing pajum ti Christ ta long pagat , manòeq kô au rih , aih pi xài au rih hòm ,mahaq Christ rih oe enh dalam ka au , manòeq au rih ta xech akia kô , aih au rih ta mannoh lui kon Boc Plinh , haq ma loq waq ka au ,chiuq cađac rađeh hu cachit am ka au . ²¹ Au ùh enh đòq kan tabàih dech da Boc Plinh loh đac ka qngwan , tàng broq tiaq ranenh men jah kan taq ataq , qmang aih Christ cachit hi qngwan qngwaiq .

3.....

Canòm ka manoh lui loq canòm ka broq tiaq Ranenh men jah taq ataq .

¹ Wùih ! mangai Galati ma blùng tau , cabô khoe tah ka pi canàih, bài mangai adroe kô nèh loq ka Jeus Christ khoe tiang đing talong pagat tiaq gleq hnoq qmòe ajang mat ? ² Au bòch pi mòeq bàu qmang kô : Aih iq canòm ka broq tiaq trong ranenh thê , loq canòm ka anòe tàng èh lui oh daq ma khoe jah Yiang Hadròeh ? ³ Gleq oh daq majah blùng hrin qmang aih? Adroe aih khoe canòm ka Yiang Hadròeh hagleg manòeq kô aih ma hi loh ka canòm ka xech akia ðòeq hu pagêh ? ⁴ Oh daq chiuq bác xalep qmang aih ðòeq hu dech do qmòh ? Tàng qmang aih joq hi qngwan ! ⁵ Boc Plinh am Yiang Hadròeh rai broq bác kan halac qne oh daq , aih tiaq trong ranenh thê loq taiq oh daq lui bàu oh daq ma khoe tàng ? ⁶ Tiaq ka Apraham lui Boc Plinh ,aih hi jah creo ka haq mangai taq ataq . ⁷ Qmang aih oh daq khòh loq rameh : Bài mangai leq i manoh lui , aih ma joq kon xau joq qnàng da Apraham . ⁸ Hset Hadròeh khoe loq adroe Boc Plinh hanoh creo ka mangai diac qnoeq jah kan taq ataq tiaq manoh lui , dài haq majah chôn timer doe ka Apraham Bàu lem kô “ Rìm taneh diac diq canòm ka ih hujah xôq ramot ” ^(a) . ⁹ Qmang aih ,waq toq cabô lui ,haq hi wiang jah xôq ramot ti Apraham aih mangai i manoh lui . ¹⁰ Majah qmang aih , rìm ngai ma canòm ka biac broq da ranenh ,aih diq oe enh qneq ka kan hamaiq , majah qmang aih i bàu achih rameh “ Joq ra-òh hamaiq qnàng ka bài mangai ma ùh cajap manoh ta rìm yiniq khoe achih ta hset ranenh ðòeq broq tiaq bài yiniq aih ^(b) . ¹¹ Joq qnàng ùh i ka cabô broq tiaq ranenh mahaq jah kan taq ataq enh ngèa Boc Plinh , trong aih joq wop , majah qmang aih mangai taq ataq rih tiaq manoh lui ^(c) . ¹² Ranenh ùh pajum ti manoh lui , mahaq ranenh achih rameh “ Mangai leq iu tiaq ranenh hi rih canòm tiaq dèh aih raq ” ^(d) . ¹³ Christ khoe baxon ahlài bèn claih enh kan hamaiq da ranenh ,majah qmang aih Haq khoe wia kan ra-òh hamaiq am ka bèn – majah qmang aih i bàu achih “ Joq ra-òh hamaiq qnàng ka mangai wì ma atua tọc talong ” ^(e) . ¹⁴ Đòq xôq ramot ma am ka Apraham canòm ka Chuaq Jesus Christ jah ta ùc jàp jia ka mangai diac qnoeq , qnah hòm ðòeq bèn canòm ka manoh lui hujah yốc Yiang Hadròeh , ma khoe têu am .

Bàu Boc Plinh têu am khoe i adroe ka ranenh

¹⁵ Yôiq oh daq , au capoch tiaq bàu kon mangai ma loq doe : Jò wì khoe gêh ka jàiq tajao , pi i bô oe jah raliang , oe jah tah tam cleq ta aih hòm . ¹⁶ Manòeq kô ,bài bàu têu am khoe jah am ka Apraham xam nang noe haq . Hset Hadròeh ùh xài doe “ am ka bài nang noe kon mangai .” tiaq am ka bác mangai , mahaq doe “ am ka nang noe da ih .” Qmang ka anoe trùh mòeq ngai raq , aih Chuaq Jesus Christ . ¹⁷ Qmang aih au doe aih rameh : Pôn hrinh piq jàt hanam atiq men i hset ranenh ,dài ma ùh jah raliang đac Bàu tajao Boc Plinh broq khoe gêh deh adroe ka aih , ranenh hadai ùh broq ka bàu têu am loh đac ka qngwan qngwaiq . ¹⁸ Majah qmang aih , tàng joq tiaq ranenh bèn jah kùng hang, aih pi oe tiaq bàu ma têu am . Mahaq Boc Plinh am ka Apraham kùng hang tiaq bàu Haq khoe têu deh adroe .

¹⁹ Tàng qmang aih ranenh òòeq broq cleq hòmm ? Ranenh neo qnoh ònh atiq , taiq kon mangai broq toq yiniq lui , gòm jò Kon da nang noe jah trùh , aih Mangai ma khoe i bàu têu deh adroe , ranenh khoe jah qnoh am enh bài bình plình èh jah anoe hlài xi mòeq ngai oe taqne .. ²⁰ Mangai taqne aih ùh xài taqne ka mòeq apah raq , mahaq Boc Plình aih i mòeq raq .

Ranenh ajèn aràng trùh ta Christ

²¹ Tàng qmang aih , ranenh pagau hlài ka bàu Boc Plình ma têu am qmòh? Ùh lòm qmang aih ! tàng joq khoe qnoh am ranenh hlàt dèch kon mangai jah kan rih , aih èh kan taq atôq hadai loh enh ranenh . ²² Mahaq Hset Hadròeh khoe clêh rìm yiniq oe enh qneq ka yiniq lui , dôt bàu ma khoe têu , enh dalam ka Christ jah am ka mangai lui . ²³ Jò kan lui qnhòq trùh , bèn diq oe enh qneq ka ranenh , hu gòm kan lui jah paqnoh . ²⁴ Qmang aih ranenh tiah ka mangai hnài òòeq hu ajèn aràng bèn trùh ta Christ , òòeq canòm ka manoh lui bèn jah wia kan taq atôq . ²⁵ Qmang aih jò manoh lui khoe trùh , bèn pi ep oe enh qneq ka cwiàng da mangai hnài aih hòmm. ²⁶ Aih iq , enh dalam ka Chuaq Jesus Christ , bèn diq jah broq kon Boc Plình . ²⁷ Oh daq diq khoe jah baptem enh dalam ka Christ , diq khoe jah caxùnh yòc Chuaq Jesus Christ . ²⁸ Qmang aih , pi i ka mangai Juda , pi i ka mangai Gorec hòmm , pi i mangai broq dic , pi i mangai broq dèh cla hòmm , pi i gucalô gucadri hòmm , majah qmang aih enh dalam Christ oh daq wia mòeq raq. ²⁹ Tàng joq oh daq joq qnàng mangai da Christ , oh daq aih nang noe da Apraham , aih bài mangai wiàng jah hang tiaq bàu ma khoe têu am .

4.....

Kon mangai oe enh qneq ka ranenh xam enh qneq kan tabòeh dech.....

¹ Manòeq kô au doe rameh , mangai wiàng jah kùng hang yac ka haq broq craq diq dõng kùng hang aih jò haq oe raq qyoh ùh i crài cleq ka hapõng . ² Haq ep oe enh qneq ka cwiàng mangai ma ranenh am , trùh jò baq haq ma khoe pajaq òòeq adroe . ³ Bèn hanoh qmang aih , jò oe raq kon qyoh , ep iu tiaq ranenh da crõng taneh . ⁴ Yàng jò ma pajaq khoe jah gèh .Boc Plình thê dèh Kon haq ha-uang loh enh mòeq ngai gucadri , ha-uang loh enh qneq ka ranenh , ⁵ hu baxon yòc bài mangai oe enh qneq ka ranenh , am bèn jah broq kon ban da haq . ⁶ Taiq oh daq aih kon haq , dài Boc Plình majah khoe thê Yiang Hadròeh da Kon haq mùt ta manoh cliac bèn , Yiang aih creò :Aba ! Baq ! ⁷ Qmang aih oh daq pi xài hapõng dic hòmm , mahaq khoe wia kon , tàng khoe wia kon , aih èh hadai wih wia mangai jah kùng hang canòm enh kan tabàih dech da Boc Plình . ⁸ Nèh haq , ùh qnì ka Boc Plình , oh daq broq dic bài kiac mahaq ùh xài kan kiac . ⁹ Yàng manòeq kô khoe jah loq ka Boc Plình , Boc Plình hadai loq ka oh daq , aih hagleq majah oe tawih hlài hu broq dic , iu tiaq bài ranenh ùh loh cleq aih? ¹⁰ Oh daq oe raq wèq ranenh hì , khê , jò ,hanam qmòh ? ¹¹ Au loq yùq am ka pì , au yùq qngwan ka au khoe abroq xalep taqne pì .

Mangai Galati tablòq manoh

¹² Au cali calo ka pì oh daq , thê pì tiah ka au , majah qmang aih au hadai tiah ka pì . Oh daq ùh i broq habo cleq ka au . ¹³ Oh daq loq jò chac au ma diq jaq ùh nèn au khoe aràng Bàu lem ka oh daq yàng baxèm . ¹⁴ pàng chac hamac au ùh nèn dài majah khoe tiah ka nen hu qnhro oh daq , yac ka oh daq ùh i jù lê au , ùh chàih cađac au , mahaq đìh au tiah ka bình plình da Boc Plình , tiah qmòc cla Jesus Christ . ¹⁵ Manòeq aih , kan lem bùi da oh daq nèh khoe taleq? Au anoe ka oh daq loq , nèh haq oh daq loq waq ka au , tàng majah aih oh daq chiùq bõc dèh clong mat am ka au . ¹⁶ Au yòc bàu joq qnàng anoe hnài oh daq ,hagleq au majah loh mangai tablêq hlài ka oh daq? ¹⁷ Bài wì aih , hnoq wì ma nhet ka oh daq , aih ùh xài wì lem manoh cleq ka pì , mahaq wì enh oh daq talah ka nhèn ,dôt oh daq nhet ka wì haq. ¹⁸ I mannoh loq nhet ka biac lem aih troq , jò leq hadai qmang aih , ùh xài toq jò i mat au . ¹⁹ Yòiq wì kon, taiq pì kon au majah chiùq kan jìq da mangai ha-uang , trùh jò leq Christ jah gèh ta dalam oh daq , ²⁰ Au ngèh manòeq kô , chop au jah oe ti pì òòeq hujah hatuàng ka pì majah qmang aih pì broq ka au joq xa ka hèm qnàng.

Aga sam Sara

²¹ Anoe ka au beq , pì oh daq mangai ma enh rih enh qneq ka ranenh , pì ùh qnì tàng ranenh anoe cleq qmòh? ²² majah qmang aih i bàu achìh rameh Apraham i baiq ngai kon calô : Mòeq aih kon da mangai gucadri broq ðeh hapõng , mòeq aih da mangai gucadri broq ðeh cla . ²³ Mahaq kon da mangai broq hapõng aih ha-uang tiaq xech akia , kon da mangai gucadri broq ðeh cla aih ha-uang tiaq bàu Boc Plinh khoe têu am adroe . ²⁴ Dìq baiq ðòeq aliah rameh : Baiq ngai gucadri aih baiq bàu tajao , mòeq aih bàu tajao ta wang Sina-i , ha-uang kon ðòeq hu broq ðic hapõng , aih da Aga . ²⁵ Manòeq kô , Aga aih wang Sina-i , oe tagùng Arabi , ùh i crài cleq ka Jêrusalem manòeq , plài aih xam kon da haq dìq broq ðic . ²⁶ Mahaq Jêrusalem enh qnhèq aih ùh broq ðic cabô , haq aih miq da bèn .

²⁷ Majah qmang aih i bàu achìh :

“ Yôiq gucadri ma xon tau , ìh mangai ma ùh dùh ðeh ka ha-uang, drah lem bùi beq , ìh mangai qnhòq lah hmaq jìq ha-uang , drah dìq manoh lem bùi drah do ma ðeh haq , Majah qmang aih , kon da mangai cadri wì ma khoe cađac, jah yeo bàc ùh hnau ka da mangai cadri ma i òng”. [*]

²⁸ Manòeq kô oh daq , bèn tiah ka Ysac , aih kon da bàu khoe têu am . ²⁹ Mahaq qmang ka calah nèh , mangai ha-uang loh tiaq xech akia ti khech rùp mangai ha-uang loh tiaq cwiang da Yiang Hadròeh qmang leq , yac ka manòeq kô hadai qmang aih. ³⁰ Mahaq Hset Hadròeh anoe cleq ? Drah hnan qnoh ðac mangai gucadri ma broq ðic qmat hloe xam kon da haq , majah qmang aih kon calô da mangai broq ðic ùh jah wiang pajùm kùng hang ti kon da mangai cadri broq ðeh cla . [*] ³¹ Qmang aih , dìq ka oh daq bèn ùh xài kon da mangai gucadri ma broq hapõng mahaq bèn kô kon da mangai gucadri ùh i broq hapõng cabô .

5

Mangai tiaq Chuaq khoe jah paclaih

¹ Christ khoe paclaih ðòeq bèn pì broq ðic , qmang aih drah yòng ma cajap, apaq ðòq rađeh oe enh qneq ka long ech hapõng ðic hòm . ² Au kô Phaulô au doe ka pì oh daq ,tàng oh daq broq ramènh kat akia , aih èh Christ ùh i lòeq cleq ka pì hòm . ³ Au doe ka mangai ma broq ramènh kat akia , wì haq ep wèq dìq ðõng ka ranenh . ⁴ Tàng pì dìq enh canòm ka ranenh ðòeq hujah kan taq atoq , qmang aih oh daq khoe talah enh gùng ka Christ , khoe hnhung kan tabàih. ⁵ Da nhèn aih , canòm manoh lùì xam Yiang Hadròeh nhèn men jah tangèh gòm kan taq atoq . ⁶ Majah qmang aih , enh dalam ka Chuaq Jesus Christ , yac kat akia ,yac ka ùh , dìq baiq ùh i loh cleq , toq manoh lùì abroq enh dalam kan loq waq ma aih ma joq i loeq joq qnàng. ⁷ Oh daq rabiaq ka cadàu , cabô khoe khech tât ùh am oh daq iu tiaq trong joq qnàng ? ⁸ Kan baxrùq aih ùh loh enh Mangai ma creò ka oh daq . ⁹ Toq xit blo broq rêu ðõng ka cađap ðac. ¹⁰ Enh dalam ka Chuaq, manoh au lùì qmang kô ,oh daq ùh baiq manoh , mahaq mangai ma broq ka oh daq loh ka rawè , ùh ðeh ka cabô , haq aih jah pòq ðeh kan baxa aih . ¹¹ Wùih oh daq , tàng joq au oe raq hnài trong ramènh kat akia , hagleq wì ma oe ti chaq rùp au? Tàng joq qmang aih , long pagat ma oe xài kan catoeh ? ¹² Au ngèh dìq ðõng bài mangai ma rai kan rawè taqne oh daq , wì haq pot ðac rađeh aih yi ùh hnau hòm! .

Plì da Yiang Hadròeh

¹³ Dìq ka pì oh daq da au , khoe jah creò trùh ta kan pì tawac , mahaq apaq yóc kan pì tawac aih hu broq nen ðòeq hu rih tiaq xech akia , mahaq drah yóc manoh cliac loq waq ðòeq broq hapõng dabau . ¹⁴ Majah qmang aih , dìq ðõng ka ranenh yùp hlài ta mòeq bàu kô “ ìh ep loq waq ka mangai haten hatia qmang ka cla [*] .

¹⁵ Mahaq tàng oh daq hit qnhah dabau , ep ngan oq ,yùq èh mangai kô loq cachit ka mangai tau . ¹⁶ Aih au majah doe : Drah cadiang tiaq Yiang Hadròeh , apaq pagèh tiaq trong xech akia ma enh

.¹⁷ Majah qmang aih , xech akia i dèh manoh enh crài ka trong Yiang Hadròeh enh , Yiang Hadròeh enh trong crài ka trong xech akia enh , wa tablòq ka dabau qmang aih, dài oh daq majah ùh khòh broq tiaq trong ðeh enh broq .¹⁸ Mahaq tàng oh daq canòm ka Yiang Hadròeh ajèn qnung , aih ùh hiaq oe enh qneq ka ranenh .¹⁹ Yiniq broq da xech akia aih hnoq qmòe a mat : Taqnong tango , trong ùh sròeh , kan manhài .²⁰ kùh waiq radua qmù , wê canàih , tagit , tablêq , tarènh , tanòeh , talech , ùh hatroq ka dabau, lah đac dabau ,²¹ da khwàiq , bù bia , plai toq ka acaq xam bacc yiniq qnoeq hatiah qmang aih . Au anoe adroe ka oh daq qmang ka au ma khoe doe :Mangai leq broq bòe yiniq qmang aih , haq aih ùh jah waq diac Boc Plinh .²² Mahaq plì da Yiang Hadròeh aih : Loq waq , lem bùi , catèm , loq kềm , laq alàng , khun khuuq , ùh tabòq manoh , tabat , loq amàn .²³ Ùh i ranenh leq ma ùh lòh bài trong aih .²⁴ Bài mangai oe ti Chuaq Jesus Christ khoe tiang đình dèh xech akia xam kan tango anang talong pagat .²⁵ Tàng bèn rih canòm ka Yiang Hadròeh , aih hadai ep cadiang tiaq Yiang Hadròeh .

²⁶ Apa q cadau chaq bang tiang ùh loh cleq ta qnhòng kô ðoeq hu dakhwàiq rai tagit dabau.

6.....

Loq wiang blòh dabau

¹ Wì oh daq! Tàng loq i cabô troq broq yiniq lui cleq , oh daq aih mangai ma i Yiang Hadròeh , drah yòc manoh tabat ðoeq hu bàt hlài wì haq , cla oh daq hadai ep wèq raðeh diq ,yùq oh daq hadai loq clih ta kan padô qnùt. ² Drah wiang blòh kan trap ka dabau , qmang aih oh daq jah broq gèh ka ranenh da Christ . ³ Majah qmang aih ,tàng loq i mangai ùh loh cleq ,mahaq xoh raðeh kô canau gau ginh , aih mangai qnùt dèh cla .⁴ Rìm ngai ep ngan hlài deh yiniq broq , aih hi hnoq kan catèh aih ajoq taiq cla , ùh xài taiq mangai qnoeq .⁵ Majah qmang aih mangai ep gènh dèh hra . ⁶ Mangai leq jah wì hnài ka raðeh Bàu Chuaq , ep yòc rìm ta kùng hang ðeh ma i ðoeq hu lah axong ka mangai hnài aih .

⁷ Apa q qnùt raðeh , Boc Plinh ùh jah blia racaih , majah qmang aih cabô rai adrech cleq ep gat dèh adrech aih . ⁸ Mangai rai ka xech akia , enh xech akia aih haq jah gat kan om hech. Mahaq mangai leq rai ka Yiang Hadròeh , enh Yiang Hadròeh haq gat kan rih halinh mòeq ðoe. ⁹ Apa q tagah ka broq biac lem , majah qmang aih tàng joq bèn ùh hiaq patrò , waq toq hi trùh jò bèn hi jah gat . ¹⁰ Qmang aih , jò bu taglâm , drah broq yiniq lem ka rìm ngai , adroe aih am ka oh daq bèn ma hadai pajum ta manoh lùì.

¹¹ Ngan tacô tì kống cla au achih am ka oh daq , pliang chù joq gròq qnàng .

Ramènh kat akiaLong Pagat da Christ .

¹² Diq dõng bài wì ma enh broq ðoeq lem manoh kon mangai tiaq trong da xech kia , wì haq panan oh daq kat akia , ðoeq ùh hiaq taiq long pagat da Christ i mangai ti rùp wì haq.¹³ Majah qmang aih, yac cla wì haq khoe kat akia dua wì haq ùh i wèq tiaq ranenh taleq, mahaq wì enh oh daq kat akia ðoeq wì haq jah catèh raðeh ta chac oh daq. ¹⁴ Da au kô hòm, au ùh catèh raðeh enh gùng ka catèh toq long pagat da Chuaq Jesus Christ bèn , taiq long pagat aih , crõng taneh kô au hnoq bu dàng khoe tiang đình , crõng taneh kô hnoq au hadai bu dàng aih ! ¹⁵ Majah qmang aih trong ma yeo nhet aih ùh xài taiq kat akia loq ùh kat akia, wih wìa kon mangai maneo aih trong ma yeo nhet . ¹⁶ Waiq kan catèm , kan loq waq trùh ti oh daq aih bài mangai broq tiaq bàu kô , trùh hloe ti Isorali aih mangai da Boc Plinh .

¹⁷ Pang kô ta èh , au ngèh apa q i cabô broq ka au ep hèm hòm ,majah qmang aih ta chac au khoe pòq wê teo da Chuaq Jesus Christ .

¹⁸ Waiq kan tabàih dech da Chuaq JesusChrist bèn oe ti mahua yang oh daq! Amen. .

